

**PEMBERITAHUAN PERTANYAAN**

**DEWAN RAKYAT, MALAYSIA**

**DARIPADA : Y.B. PUAN SITI ZAILAH BINTI MOHD YUSOFF  
(RANTAU PANJANG)**

**PERTANYAAN : BERTULIS**

**Y.B. PUAN SITI ZAILAH BINTI MOHD YUSOFF [ RANTAU PANJANG ]**

minta **MENTERI KEWANGAN** menyatakan :-

(a) jumlah syarikat yang belum berdaftar dalam pelaksanaan GST dan yang sudah berdaftar setakat ini; dan

(b) perkembangan terkini pencapaian 1MDB serta prestasi hutang 1MDB dan pelaburan dalam dan luar negara setakat ini.

**JAWAPAN**

- a. Untuk makluman Yang Berhormat, sehingga 8 Jun 2015, sebanyak 380,082 syarikat telah pun berdaftar di bawah sistem GST. Daripada jumlah tersebut, 94% terdiri daripada Perusahaan Kecil dan Sederhana

(PKS). JKDM akan terus melaksanakan OPS GST bagi mencari syarikat yang gagal berdaftar. JKDM akan berkerjasama rapat dengan Suruhanjaya Syarikat Malaysia (SSM) untuk mengenal pasti peniaga yang berdaftar dengan SSM dan memastikan mereka berdaftar serta mengenakan GST sekiranya telah memenuhi syarat yang ditetapkan.

Di bawah undang-undang GST, perniagaan yang telah mencapai *threshold* dan layak untuk mendaftar tetapi tidak berdaftar telah melakukan kesalahan di bawah seksyen 96 Akta Cukai Barang dan Perkhidmatan 2014. Sekiranya syarikat tersebut disabitkan kesalahan, denda sebanyak tidak melebihi RM50,000 atau penjara tidak melebihi dua tahun atau kedua-duanya boleh dikenakan.

b. Jumlah liabiliti 1MDB pada tahun kewangan berakhir 31 Mac 2014 adalah sebanyak RM42 bilion. Maklumat lengkap boleh diperoleh melalui Penyata Kewangan yang telah diaudit dan boleh dimuat-turun melalui laman web Suruhanjaya Syarikat Malaysia (SSM).

1MDB sebagai sebuah syarikat pelaburan strategik Kerajaan sentiasa berhati-hati di dalam membuat keputusan pelaburan terutamanya dalam keadaan ekonomi global yang mencabar seperti sekarang.

Secara umumnya, hala tuju pelaburan 1MDB adalah dalam empat bidang, iaitu tenaga, hartanah strategik, pelancongan dan hospitaliti, dan perniagaan berasaskan pertanian.

Sehingga kini, 1MDB telah melabur dalam bidang tenaga dan hartanah strategik. Di antara pelaburan yang sedang dijalankan adalah seperti berikut:

### **1. Sektor Tenaga**

Sektor tenaga adalah salah satu sektor penting dalam portfolio pelaburan 1MDB. Melalui anak syarikatnya Edra Energy Sdn Bhd, 1MDB telah berjaya menjadi salah satu pengeluar tenaga bebas antarabangsa yang terkemuka di Asia Tenggara dengan portfolio 13 loji jana kuasa dan penyahgaraman atau *desalination* di lima buah negara (Malaysia, Mesir, Bangladesh, Pakistan, dan Emiriah Arab Bersatu). Edra Energy juga merupakan pengeluar tenaga bebas kedua terbesar di Malaysia, dan terbesar di Mesir dan Bangladesh. Aset-aset tenaga 1MDB ini mempunyai kapasiti penjanaan tenaga bersih sebanyak 5594 MW, iaitu kira-kira 3112MW (56%) di Malaysia dan 2482MW (44%) di luar negara.

Manakala bagi **sektor hartanah strategik** pula, dua projek utama

1MDB adalah seperti berikut:

## **2. Tun Razak Exchange (TRX)**

Projek ini dianggarkan mempunyai nilai pembangunan kasar atau *gross development value (GDV)* sebanyak **RM40 bilion** dan mempunyai jangka masa pembinaan selama 15 tahun. Projek ini mempunyai visi untuk membangunkan Kuala Lumpur sebagai hab kewangan antarabangsa selaras dengan hasrat Kerajaan untuk menjadikan Kuala Lumpur sebagai sebuah Bandaraya global.

Pada 19 Mac 2015, 1MDB Real Estate (1MDB RE) bersama *Lend Lease* telah memeterai Perjanjian Usahasama (*Joint Venture Agreement*) dan Perjanjian Jual Beli (*Sale and Purchase Agreement*) untuk membangunkan '*Lifestyle Quarter*'. Di samping itu, TRX juga telah menandatangani perjanjian konsesi selama 20 tahun dengan *Veolia Water Technologies Southeast Asia* untuk rawatan air sisa dan bekalan air kitar semula di TRX.

TRX kini juga sedang memuktamadkan beberapa perundingan dengan beberapa syarikat tempatan dan antarabangsa untuk menjadi pemaju dan penyewa utama bagi beberapa plot di tapak TRX.

Dalam masa yang sama, TRX juga sedang bekerjasama dengan pelbagai agensi Kerajaan untuk kerja-kerja peningkatan liputan rangkaian infrastruktur di kawasan pinggiran pembangunan TRX.

### **3. Bandar Malaysia**

Bandar Malaysia merupakan projek pembangunan semula lapangan terbang lama Sungai Besi. Pada masa ini projek pembangunan bandar bersepadu ini bersaiz **495 ekar** adalah dalam peringkat memuktamadkan pelan induknya. Ia juga akan menempatkan terminal utama kereta api laju KL-Singapura serta Jajaran Kedua MRT.

Di samping itu, Bandar Malaysia juga akan melaksanakan projek rumah mampu milik yang bercirikan kehidupan moden dan berkualiti. Apabila pelan induk telah dimuktamadkan dan telah menerima kelulusan yang sepatutnya, lebih banyak maklumat mengenai pembangunan tersebut akan dapat dikongsi dengan orang ramai, termasuk kepada penduduk setempat.

Pada masa ini, 1MDB sedang melaksanakan kerja-kerja pembinaan fasiliti baru dan moden bagi Tentera Udara Diraja Malaysia, Tentera Darat Malaysia dan Polis Diraja Malaysia di lapan tapak berbeza di

seluruh Malaysia dan fasiliti baru tersebut dijangka siap pada akhir  
2016.